

**BUS NR. 33**

Text: Martin Hauzenberger

In Züri fahrt e Trolleybus,  
Tagy, taguus – stadty, stadtuus,  
Rundum im wahrschte Sinn.  
Bi vierzg Haltstelle het er still.  
Wär di Stopps alli kenne will,  
Merkt: Da steckt alles drinn.

E Kurve rund um Züri um,  
Wo fasch all Chreis dürfahrt.  
Dä Dreiedryssger-Bus het drum  
Haltstelle aller Art.

Me pflegt der literarisch Schatz:  
D Manesse-Lieder hei e Platz,  
Gnau wi d Joheidi Spyri.  
Es Zwinglihuus, Hölderlinsteig,  
U für di frömde Sprache seig  
D Höschgass: fir d Basler z Zyri.

O Grünen-Stadt-Züri isch im Schwang:  
Rotbuech, Thuja u Vogelsang,  
Botanisch u Rosegarte.  
Das Grünen ligt ohni Wasser flach:  
Nach Klosbach, Wildbach, Hegibach  
Tuet e tiefe Brunne warte.

E Kurve rund um Züri um,  
E Chehr dür fasch all Chreis.  
Dä Dreiedryssger-Bus macht drum  
Us zwöi Drü d Nummer Eis.

So flüssig louft dä Bus nid gäng,  
Der Fahrplan gilt nid gar so sträng:  
Chli z spät, chli z früech – egal!  
Di Waffeplatzstrass tönt nach Bluet;  
Da passt der Fridhof Sihlfäld guet  
U ds Bethaniespital.

E Fröhlich- und e Freiestrass:  
We der Frisch wär fromm gsi, gäbti das  
E Turnverein da druus.  
Me fahrt dür Kraft und Gloria:  
So fahrt e Heldestory aa.  
O dä Bus wucht nid uus.

E Kurve rund um Züri um,  
E Chehr dür all Quartier.  
Dä Dreiedryssger-Bus chunnt drum  
Derhär – starch wi ne Stier.

Im Bus vor Linie Thirty-three  
Gsehts mängisch zimlech dirty dry:  
S isch immer Ässenszyt.  
E Dönerstand im Trolleybus,  
O d Pizza drängt i volle Bus,  
U d Fläsche sy nie wyt.

Im Bus vor Linie Trentatre  
Chasch Sprache ghöre, Type gseh,  
Vo voll krass bis voll Gäld.  
Vom Züribärg i ds Morgetal:  
I däm Bus gsehsch uf jede Fall  
Di ganzi chlyni Wält.

E Kurve rund um Züri um,  
E Chehr quer dür di Stadt.  
Wo blybt er hütt ächt – u warum?  
I ha das Warte satt!